

GLÜCKSKIND

des glück von an kind
kann a schaumhäferl sein
des glück von an kind
kennan regntropfn sein
de im summa am asphalt foin und nockad vaglühn
des glück von an kind
kann afoch sein

des glück von an kind
kann a marienkäferl sein
des glück von an kind
kann a hand zan hoidn sein
de im winta wann s gfrorn hot an auffangt und waamt
des glück von an kind
kann afoch sein

und wannst ned grad a glückskind bist
vom frischn neichn mond
dann san fia di de sonntog olle gleich
wannst owa a glückskind bist
von an echtn neichn mond
kann söbst a grauer donnerstog fia di zun sonntag wean
weu de sonntag hom ollaweu scho den glückskindern gheat
san reserviert fia de ganz bsondan leut

owa des glück von an kind
muass ka sonntagsgwand trogn
des glück von an kind
muass kann schüilling nochjogn
des glück von an kind kann ois sein oda nix
des glück von an kind
kann afoch sein